

摛藻堂四庫全書薈要

史部

欽定四庫全書叢要

史部

宋史卷四百九十二

詳校官編修臣王天祿



欽定四庫全書薈要卷六千一百十九

史部

宋史卷四百九十一

元中書右丞相總裁托克托等修

傳第二百五十

外國七

流求國 定安國 勃海國 日本國 党項

流求國在泉州之東有海島曰彭湖烟火相望其國塹柵三重環以流水植棘爲藩以刀稍弓矢劒鼓為兵器

眎月盈虧以紀時無他竒貨商賈不通厥土沃壤無賦
歛有事則均稅旁有毗舍邪國語言不通袒裸盱睢殆
非人類淳熙間國之酋豪嘗率數百輩猝至泉之水澮
圍頭等村肆行殺掠喜鐵器及匙筋人閉戶則免但刃
其門圈而去擲以匙筋則頻拾之見鐵騎則爭頑其甲
駢首就戮而不知悔臨敵用標鎗繫繩十餘丈為操縱
蓋惜其鐵不忍棄也不駕舟楫惟縛竹為筏急則羣昇
之泅水而遁

定安國本馬韓之種為契丹所攻破其酋帥糾合餘衆
保于西鄙建國改元自稱定安國開寶三年其國王烈
萬華因女真遣使入貢乃附表貢獻方物太平興國中
太宗方經營遠略討擊契丹因降詔其國令張犄角之
勢其國亦怨寇讎侵侮不已聞中國用兵北討欲依王
師以攄宿憤得詔大喜六年冬會女真遣使來貢路由
本國乃托其使附表來上云定安國王臣烏亥明言伏
遇聖主洽天地之恩撫夷貊之俗臣玄明誠喜誠抃願

首頤首臣本以高麗舊壤渤海遺黎保據方隅涉厯星
紀仰覆露鴻鈞之德被浸漬無外之澤各得其所以遂
本性而頃歲契丹恃其強勁入我境土攻破城砦俘略
人民臣祖考守節不降與衆避地僅存生聚以迄于今
而又扶餘府昨背契丹竝歸本國災禍將至無大於此
所宜受天朝之密畫率勝兵而助討必欲報敵不敢違
命臣玄明誠懇誠願頤首頤首其末題云元興六年十
月日定安國王臣玄明表上聖皇帝前上答以詔書曰

勅定安國王烏玄明女真使至得所上表以朕嘗賜手
詔諭旨且陳感激卿遠國豪帥名王茂緒奄有馬韓之
地介于鯨海之表彊敵吞併失其故土沉寃未報積憤
奚伸矧彼獯戎尚搖蠶毒出師以薄伐乘夫天災之流
行敗衄相尋滅亡可待今國家已于邊郡廣屯重兵只
俟嚴冬即申天討卿若能追念累世之恥宿戒舉國之
師當予伐罪之秋展爾復仇之志朔漠底定爵賞有加
宜思永圖無失良便而況渤海願歸於朝化扶餘已背

於賊庭勵乃宿心糾其協力克期同舉必集大勲尚阻
重溟未遑遣使倚注之切鑒寐寧忘以詔付女真使令
齎以賜之端拱二年其王子因女真使附獻馬雕羽鳴
鏑淳化二年其王子太元女真使上表其後不復至
渤海本高麗之別種唐高宗平高麗徙其人居中國則
天萬歲通天中契丹攻陷營府高麗別種大祚榮走保
遼東睿宗以為急汗州都督封渤海郡王因自稱渤海
國併有扶餘肅慎等十餘國歷唐梁後唐朝貢不絕後

唐天成初為契丹阿保機攻扶餘城下之改扶餘為東
丹府命其子突厥留兵鎮之阿保機死渤海王復攻扶
餘不能克厯長興清泰遣使朝貢周顯德初其酋豪崔
烏斯等三十人來歸其後隔絕不能通中國太平興國
四年太宗平晉陽移兵幽州其酋帥大鸞河率小校李
勛等十六人部族三百騎來降以鸞河為渤海都指揮
使六年賜烏舍城浮渝府渤海琰府王詔曰朕纂紹丕
構奄有四海普天之下罔不率俾矧太原封域國之保

障頃因竊據遂相承襲倚遼為援厯世逋誅朕前歲親
提銳旅盡護諸將拔并門之孤壘斷匈奴之右臂眷言
弔伐以蘇黠黎蠢茲北戎非理構怨輒肆荐食犯我村
略一昨出師逆擊斬獲甚衆今欲鼓行深入席捲長驅
焚其龍庭大殲醜類素聞爾國密邇寇讎迫於吞并力
不能制因而服屬困於率割當靈旗破敵之際是隣邦
雪憤之日所宜盡出族帳佐予兵鋒俟其翦滅沛然封
賞幽薊土宇復歸中原朔漠之外悉以相與勗乃協力

朕不食言時將大舉征契丹故降是詔諭旨九年春宴
大明殿因召大鸞河懼撫久之上謂殿前都校劉延翰
曰鸞河渤海豪帥束身歸我嘉其忠順夫夷落之俗以
馳騁為樂候高秋戒候當與駿馬數十匹令出郊遊獵
以遂其性因以緡錢十萬并酒賜之

日本國者本倭奴國也自以其國近日所出故以日本
為名或云惡其舊名改之也其地東西南北各數千里
西南至海東北隅隔大山山外即毛人國國自後漢始

朝貢歷魏晉宋隋皆來貢唐永徽顯慶長安開元天寶上元貞元元和開成中並遣使入朝雍熙元年日本國僧喬然與其徒五六人浮海而至獻銅器十餘事并本國職員今王年代紀各一卷喬然衣綠自云姓藤原氏父為真連真連其國五品品官也喬然善隸書而不通華言問其風土但書以對云國中有五經書及佛經白居易集七十卷並得自中國土宜五穀而少麥交易用銅錢文曰乾文寶畜有水牛驢羊多犀象產絲蠶多

織絹薄綾可愛樂有國中高麗二部四時寒暑大類中國國之東境接海島夷人所居身面皆有毛東奧州產黃金西別島出白銀以為貢賦國王以王為姓傳襲至今王六十四世文武僚吏皆世官其年代紀所記云初主號天御中主次曰天村雲尊其後皆以尊為號次天八重雲尊次天彌聞尊次天忍勝尊次瞻波尊次萬魂尊次利利魂尊次國狹槌尊次角龔魂尊次汲津丹尊次面垂見尊次國常立尊次天鑑尊次天萬尊次沫名

杵尊次伊奘諾尊次素戔嗚尊次天照大神尊次正哉
吾勝速日天押穗耳尊次天彦尊次炎尊次彦歛尊凡
二十三世立都於筑紫日向宮彥歛第四子號神武天
皇自筑紫宮入居太和州櫛原宮即位元年甲寅當周
僖王時也次綏靖天皇次安寧天皇次懿德天皇次孝
昭天皇次孝天皇次孝靈天皇次孝元天皇次開化天
皇次崇神天皇次垂仁天皇次景行天皇次成務天皇
次仲哀天皇國人言今為鎮國香椎大神次神功天皇

開化天皇之曾孫女又謂之息長足姫天皇國人言今
為太奈良姫大神次應神天皇甲辰歲始於百濟得中
國文字今號八蕃菩薩有大臣號紀武內年三百七歲
次仁德天皇次履中天皇次反正天皇次允恭天皇次
安康天皇次雄畧天皇次清寧天皇次顯宗天皇次仁
賢天皇次武烈天皇次繼體天皇次安開天皇次宣化
天皇次天國排開廣庭天皇亦名欽明天皇即位十一
年壬申歲始傳佛法於百濟國當此土梁承聖元年次

敏達天皇次用明天皇有子曰聖德太子年三歲聞十人語同時解之七歲悟佛法于菩提寺講聖鬢經天雨曼陀羅華當此土隋開皇中遣使泛海至中國求法華經次崇峻天皇次推古天皇錄明天皇之女也次舒明天皇次皇極天皇次孝德天皇白雉四年律師道照求法至中國從三藏僧玄奘受經律論當此土唐永徽四年也次天豐財重日足姫天皇令僧智通等入唐求大乘法相教當顯慶三年次天智天皇次天武天皇次持

總天皇次文武天皇大寶三年當長安元年遣粟田真人入唐求書籍律師道慈求經次阿閉天皇次坂依天皇次聖武天皇寶龜二年遣僧正玄昉入朝當開元四年次孝明天皇聖武天皇之女也天平勝寶四年當天寶中遣使及僧入唐求內外經教及傳戒次天吹天皇次高野姬天皇聖武天皇之女也次白壁天皇二十四年遣二僧靈仙行賀入唐禮五臺山學佛法次桓武天皇遣騰元葛野與空海大師及延暦寺僧澄入唐詣天

台山傳智者正觀義當元和元年也次諾樂天皇次嵯
義天皇次淳和天皇次仁明天皇當開成會昌中遣僧
入唐禮五臺次文德天皇當大中年間次清和天皇次
陽成天皇次光孝天皇遣僧宗睿入唐傳教當光啟元
年也次仁和天皇當此土梁龍德中遣僧寬建等入朝
次醍醐天皇次天慶天皇次封上天皇當此土周廣順
年也次冷泉天皇今為太上天皇次守平天皇即今王
也凡六十四世畿內有山城大和河內和泉攝津凡五

州共統五十三郡東海道有伊賀伊勢志摩尾張參河
遠江駿河伊豆甲斐相模武藏安房上總常陸凡十四
州共統一百一十六郡東山道有通江美濃飛驒信濃
上野下野陸奥出羽凡八州共統一百二十二郡北六
道有狹越前加賀能登越中越後佐渡凡七州共統三
十郡山陰道有丹波丹波祖馬因幡伯耆出雲石見隱
岐凡八州共統五十二郡小陽道有播磨美竹備前備
中備後安藝周防長門凡八州共統六十七郡南海道

有伊紀淡路河波讚耆伊豫土佐凡六州共統四十八
郡西海道有筑前筑後豐前豐後肥前肥後日向大隅
薩摩凡九州共統九十三郡又有壹伎對馬多祿凡三
島各統二郡是謂五畿七道三島凡三千七百七十二
都四百一十四驛八十八萬三千三百二十九課丁課
丁之外不可詳見皆裔然所記云按隋開皇二十年倭
王姓阿每名自多利思比孤遣使致書唐永徽五年遣
使獻琥珀馬腦長安二年遣其朝臣真人貢方物開元

初遣使來朝天寶十二年又遣使來貢元和元年遣高
階真人來貢開成四年又遣使來貢此與其所記皆同
大中光啟龍德及周廣順中皆嘗遣僧至中國唐書中
五代史失其傳唐咸亨中及開元二十三年大歷十二
年建中元年皆來朝貢其記不載太宗召見奮然存撫
之甚厚賜紫衣館于太平興國寺上聞其國王一姓傳
繼臣下皆世官因歎息謂宰相曰此島夷耳乃世祚遐
久其臣亦繼襲不絕此蓋古之道也中國自唐季之亂

寓縣分裂梁周五代享歷尤促大臣世胄鮮能嗣續朕雖德慙往聖常夙夜寅畏講求治本不敢暇逸建無窮之業垂可久之範亦以為子孫之計使大臣之後世襲祿位此朕之心焉其國多有中國典籍裔然之來復得孝經一卷越王孝經新義第十五卷皆金縷紅羅襯水晶為軸孝經即鄭氏注者越王者乃唐太宗子越王貞新義者記室參軍任希古等撰也裔然復求詣五臺許之令所過續食又求印本大藏經詔亦給之二年隨

台州寧海縣商人鄭仁德船歸其國後數年仁德還喬
然遣其弟子喜因奉表來謝曰日本國東大寺大朝法
濟大師賜紫沙門喬然啟傷鱗入夢不忘漢主之恩枯
骨合歡猶亢魏氏之敵雖云羊僧之拙誰忍鴻儒之誠
喬然誠惶誠恐頓首死罪喬然附商船之離岸期
魏闕於生涯望落日而西行十萬里之波濤難盡顧信
風而東別數千里之山嶽易過妄以下根之卑適詣中
華之盛於是宣旨頗降恣許荒外之跋涉宿心克協粗

觀寓內之瓊奇况乎金闕曉後望堯雲於九禁之中巖
扃晴前拜聖燈於五臺之上就三藏而稟學巡數寺而
優游遂使蓮華迴文神筆出於北闕之北貝葉印字佛
詔傳於東海之東重蒙宣恩忽趁來跡季夏解台州之
纜孟秋達本國之郊爰建明春初到舊邑縕素欣侍侯
伯慕迎伏惟陛下惠溢四溟恩高五嶽世超黃軒之古
人直金輪之新奮然空辭鳳凰之窟更還螻蟻之封在
彼在斯只仰皇德之盛越山越海敢忘帝念之深縱粉

百年之身何報一日之惠染筆拭淚伸紙搖魂不勝慕
恩之至謹差上足弟子傳燈大法師位嘉因并大朝剃
頭受戒僧祚乾等拜表以聞稱其本國永延二年歲次
戊子二月八日實端拱元年也又別啟貢佛經納青水
函琥珀青紅白水晶紅黑水穗子念珠各一連並納螺
鉢花形平函毛籠一納螺極一口葛籠一納法螺二口
染皮二十枚金銀蒔繪管一合納髮鬢二頭又一合納
參議正四位上藤佐理手書二卷及進奉物數一卷表

狀一卷又金銀詩繪硯一管一合納金硯一鹿毛筆松
煙墨金銅水瓶鐵刀又金銀詩繪扇管一合納檜扇二
十枚蝙蝠扇二枚螺鈿梳函一對其一納赤木梳二百
七十其一納龍骨十幅螺鈿書案一螺鈿書几一金銀
詩繪平管一合納白細布五匹鹿皮籠一納貂裘一領
螺鈿鞍轡一副銅鐵燈紅絲鞶泥障倭畫屏風一雙石
流黃七百斤咸平五年建州海賈周世昌遭風飄至日
本凡七年得還與其國人勝木吉至上皆召見之世昌

以其國人唱和詩來上詞甚雕刻膚淺無所取詢其風俗云婦人皆被髮一衣用二三縑又陳所記州名年號上令藤木吉以所持木弓矢挽射矢不能遠詰其故國中不習戰鬪賜木吉治裝錢遣還景德元年其國僧寂照等八人來朝寂照不曉華言而識文字繕寫甚妙凡問答竝以筆札詔號圓通大師賜紫方袍天聖四年十二月明州言日本國太宰府遣人貢方物而不持本國表詔却之其後亦未通朝貢南賈時有傳其物貨至中

國者熙寧五年有僧誠尋至台州止天台國清寺願留
州以聞詔使赴闕誠尋獻銀香爐木櫈子白琉璃五香
水精紫檀琥珀所飾念珠及青色織物綾神宗以其遠
人而有戒業處之開寶寺盡賜同來僧紫方袍是後連
貢方物而來者皆僧也元豐元年使通事僧仲回來賜
號慕化懷德大師明州又言得其國太宰府牒因使人
孫忠還遣仲回等貢絳二百匹水銀五千兩以孫忠乃
海商而貢禮與諸國異請自移牒報而答其物直付仲

回東歸從之乾道九年始附明州綱首以方物入貢淳熙二年倭船火兒勝太明殿鄭作死詔械太明付其綱首歸治以其國之法三年風泊日本舟至明州衆皆不得食行乞至臨安府者復百餘人詔人日給錢五十文米二升俟其國舟至日遣歸十年日本七十三人復飄至秀州華亭縣給常平義倉錢米以振之紹熙四年泰州及秀州華亭縣復有倭人為風所泊而至者詔勿取其貨出常平米振給而遣之慶元六年至平江府嘉泰

二年至定海縣詔並給錢米遣歸國

黨項古析支之地漢西羌之別種後周世始強盛有細
風氏費聽氏往利氏頗超氏野亂氏房當氏來禽氏招
拔氏最為強族唐貞觀至上元間內附散居西北邊元
和以後頗相率為盜會昌初武宗置三使以統之在邠
寧延者為一使在鹽夏長澤者為一使在靈武麟勝者
為一使五代亦常入貢今靈夏綏麟府環慶豐州鎮戎
天德振武軍並其族帳太祖建隆二年代州刺史折也

埋來朝也埋黨項之大姓世居河右有捍邊之功故授以方州召令入覲而遣還開寶元年直蕩族首領啜佶等引并人寇府州為王師所敗詔內屬羌部十六府大首領屈遇與十二府首領羅崖領所部誅啜佶啜佶懼以其族歸順以屈遇為檢校太保歸德將軍羅崖啜佶並為檢校司徒懷化將軍太平興國二年二月靈州部送歲市官馬賂所過族帳物粗惡羌人恚不受知州比部郎中張全操捕得十八人殺之沒入其兵仗羊馬戎

人遂擾上遣使齎金帛撫賜其族與之盟始定召全操
下有司鞫之決杖流登州沙門島是歲靈州通遠軍界
槩咩族折四族吐蕃村族奈喝三家族尾落族奈家族
槩泥族剽略官網詔靈州安守忠通遠軍董遵誨討平
之六年府州外浪族首領來都等來貢馬七年豐州大
首領黃羅并弟乞蚌等來貢馬又銀州羌部拓跋遇來
訴本州賦役苛虐乞移居內地詔令各守族帳又保細
族結集扇動諸部夏州巡檢使梁迥率兵討平之雍熙

初諸族渠帥附李繼遷為寇詔判四方館事田仁朗及
閻門使王侁等相繼領兵討擊并賜麟府銀夏豐州及
日利月利族勑書招諭之二年四月侁等於銀州北破
悉利諸族斬首三千六百餘級生擒八十人俘老小一
千四百餘口器甲一百八十六具僞署代州刺史折羅
遇并弟埋乞獲馬牛羊三萬計五月又於開光谷西杏
子平破保寺保香族追奔二十餘里斬首八百餘級梟
其首領埋也已等五十七人生擒四十九人俘其老小

三百餘人獲牛羊馬驢凡四千餘計又破保洗兩族俘三千人降五十五族獲牛羊八千計侁等又言麟州及三族砦羌人二千餘戶皆降酋長折御也等六十四人獻馬首罪願改圖自効為國討賊遂與部下兵入濁輪川斬賊首五十級酋豪二十人李繼遷及三族砦監押折御也皆遁去旋命內客省使郭守文自三交乘驛亟往與王侁等同領邊事五月王侁李繼隆等又破銀州杏子平東北山谷內沒邵浪悉訛等族及濁輪川東兗

頭川西諸族生擒七十八人梶五十九人俘二百三十
六口牛羊驥馬千二百六十招降千四百五十二戶六
月夏州尹憲等引兵至監城吳移越移等四族來降憲
等撫之岌伽羅膩十四族拒命憲等縱兵斬首千餘級
俘擒百人焚千餘帳獲馬牛羊七千計又降銀麟夏等
州三族砦諸部一百二十五族合萬六千一百八十九
戶酋豪折御也窮蹙來歸守文置之部下又夏州咩嵬
族魔病人也崖在南山族結黨為寇招懷不至擒斬之

梟首徇衆并滅其族又府州女也族首領來母崖男社
正等內附因遷居茗也族中七月賜宥州界咩兀十族
首領都指揮使遇乜布等九人勅書以安撫之十一月
以勒浪族十六府大首領屈遇名波族十二府大首領
浪買當豐州路最為忠順及兀泥三族首領佶移等女
女四族首領殺越都等歸化並賜勅書撫之端拱元年
三月火山軍言河西羌部直蕩族內附三年四月夏州
趙保忠言臣準詔市馬已獲三百匹其宥州御泥布囉

樹等二族黨附繼遷不肯賣馬臣遂領兵掩殺二百餘人擒百餘人其族即降各已安撫詔書獎諭之十月繼遷寇會州熟倉族為其首領咩噲率來離諸族擊走之淳化元年藏才三族都判啜尾卒其子啜香來請命乃令代其父二年七月以黃乜族降戶七百餘散于銀夏州舊地處之八月李繼遷居玉庭鎮趙保忠往襲之繼遷奔鐵斤澤貌奴猥才二族奪其牛畜二萬餘十一月繼遷寇熟倉族刺史咩噲率來離諸族擊退之先是兀

泥大首領泥中佶移內附詔授慎州節度俄復歸繼遷
其長子突厥羅與首領黃羅至是以千餘帳降府州折
御卿以聞降詔慰諭之趙保忠又襲破宥州御泥布羅
樹二族尋各降之以其朋附繼遷來上四年三月直蕩
族大首領啜尾子河汎大首領馬一竝來貢詔以啜尾
叔羅買為本族都監又啜尾下首領十人馬一下首領
十二人皆賜錦袍銀帶器幣是年鄭文寶獻議禁青鹽
羌族四十四首領盟于楊家族引兵騎萬三千餘人入

寇環州石昌鎮知環州程德玄等擊走之因詔屯田員
外郎知制誥錢若水馳驛詣邊弛其鹽禁由是部族寧
息十二月鹽州羌人酋長巢延渭為本州刺史是年藏
才西族大首領羅妹來貢五年正月以綏州羌酋蘇移
山海啜母駝香三人並為懷化將軍野利嵬名也屈啜
泥三人並為歸德郎將四月府州折御卿言銀夏州管
勾生戶八千帳族悉來歸附錄其馬牛羊萬計邈二族
大首領崖羅藏才東族首領歲囉啜克各遣其子弟朝

貢六月繼遷所驅脅固屬戎人橐駕路熟藏族首領也遇率部族反攻繼遷其弟力戰而死既敗繼遷之衆復來歸附以遇為檢校司空領會州刺史是年兀泥族首領黃羅內附以為懷化將軍領昭州刺史至道元年四月以勒浪嵬女兒門十六府大首領馬尾等內附以馬尾為歸德大將軍領恩州刺史以勒浪樹李兒門首領沒崖為安化郎將副首領遇兀為保順郎將六月賜慶州界首領順州刺史李奉明澄州刺史李彥咩鹽州刺

史巢延渭演州刺史李順忠環州界首領會州刺史也
遇及靈州界并河外保安保靖臨河懷遠定遠五鎮等
部勑書慰撫之七月睡泥族首領你也逋令男詣靈州
言族內七百餘帳為李繼遷劫略首領嘵逋一族奔往
蕭關你也逋一族乞賜救助詔賜以資糧環州熟倉族
佢遇畧奪繼遷牛馬三十餘繼遷令人招撫之佢遇答
云吾一心向漢誓死不移詔以遇為會州刺史賜帛五
十匹茶五十斤二年三月以府州界五族大首領折突

厥移為安遠大將軍父死來請命也六月勒浪族副首領遇兀等百九十三人歸附貢馬七匹遇兀舊隸契丹淳化初遷族帳於府州界東至河百五十里南至府州三百里至是始朝貢上召問慰勞賜錦袍銀帶遇兀言部族多良馬今始來朝所貢未備上曰吾嘉爾忠順之節慕化來歸固不以多馬為意也七月李繼隆出討繼遷賜麟府州兀泥巾族大首領突厥羅女女殺族大首領越都女女夢勒族大首領越移女女忙族大首領越

置女女簣兒族大首領党移沒兒族大首領莫末移路
也族大首領越移細也族大首領慶元路才族大首領
羅保細母族大首領羅保保也凡十族勅書招懷之閏
七月懷安鎮羌誘諸族寇慶州監軍趙繼昇率師擊敗
之斬首三百級獲羊馬千計三年二月泥巾族大首領
名悉俄首領皆移尹遇崔保羅沒佶凡五人來貢馬名
悉俄等舊皆內屬因李繼遷之叛徙居河址今復來貢
咸平元年三月熟倉族亂遇來朝真宗嘉其誠節親見

撫勞賜以器幣十月兀泥族大首領昭州刺史黃羅對于崇德殿兀泥族在青岡嶺三角城龍馬川領族帳千五百戶初隸繼遷俄投府州淳化中數敗契丹及與繼遷相攻擊及繼遷內附黃羅懼北徙過黃河今還舊地遂入貢且言繼遷既受朝命不敢侵伐上面加獎慰賜賚甚厚十二月詔直蕩族大首領鬼啜尾于金家堡置渡令諸族互市二年正月以咩逋族開道使泥埋領費州刺史十月以勒浪族十六府大首領歸德大將軍恩

州刺史馬泥領本州團練使十一月藏才八族大首領
皆賞羅等來獻名馬四年七月以會州刺史癿遇為保
順郎將蘇家族屈尾鼻家族都慶白馬族埋香韋移族
都香為安化郎將九月環州言繼遷所掠羌族嵬逋等
徒帳來歸又繼遷諸羌族明葉示及撲咩訛猪等首領
率屬內附並令給善地處之其年卑寧族首領喝鄰半
祝貢名馬自稱有精騎三萬願備驅策有詔慰獎厚償
其直五年咩逋族開道使費州刺史泥埋遣子城逋入

貢上嘉泥埋數與繼遷戰鬪有勞授錦州團練使以其族弟屈子為懷化將軍充本族指揮使城逋為歸德將軍充本族都巡檢使餘首領署軍主以下名職者凡十數人又以黑山北莊郎族龍移為安遠大將軍昧克為懷化將軍八月河西教練使李榮等向化其年羌寇抄金明縣李繼周擊走之十月詔河西戎人歸投者遷内地給以閑田時勒厥麻等三族千五百帳以濁輪砦失守越河內屬分處邊境邊臣屢言勒厥麻往來賊中恐

復叛去乃徙置憲州樓煩縣遣使賜金帛撫慰十二月
咩逋族遣使來貢上聞賀蘭山有小涼大涼族甚盛常
恐與繼遷合勢為患近知互有疑隙輒相攻掠朝廷欲
遂撫之乃召問咩逋使者因其還特詔賜之以激其立
効上又謂樞密使王繼英等曰邊臣言遷賊舉兵屢為
龍移昧克所敗此族在黃河北數萬帳或號莊郎昧克
常以馬附藏才入貢頗勤外禦六年遂降詔獎慰之二
月葉市族囉埋等持繼遷偽署牒率百餘帳來歸以囉

埋為本族指揮使囉胡為軍使邠寧部署言牛羊蘇家等族殺繼遷族帳有功上曰此族恃遠與險久為賊援屢遣邊吏招諭近聞有志內附尚疑其詐果能格鬪立勅詔厚賜首領等茶綵以獎激之涇原部署言者龍移卑陵山首領廝敦琶遣使稱已集本族騎兵願隨軍討賊三月以咩逋族首領泥埋領鄯州防禦使充靈州河外五鎮都巡檢使時潘羅支已授河西節制上以泥埋實與羅支掎角捍賊故加恩寵是月綏州羌部軍使拽

白等百九十五口內屬原州熟戶裴天下等請率族兵掩擊遷黨移湖等帳來求策應部署司不報上以戎人宣力禦賊不應沮之即詔諭諸路以精甲策應環州酋長蘇尚娘擊賊有勞及屢告賊中機事以為臨州刺史賜錦袍銀帶環慶部署張凝言內屬戎人與賊界錯居屢為脅誘臣領兵離木波鎮直湊八州原下砦招降岑移等三十二族又至分水嶺降麻謀等二十一族柔遠鎮降巢迷等二十族遂抵業樂降都樹羅家等一百族

合四千八十戶第給袍帶物綵慰遣還帳四月繼遷寇洪德砦酋長慶香與癿都慶族合勢擊之以砦兵策援大敗繼遷擒四十九人墜崖死者甚衆獲馬七十餘匹旗鼓鎧甲數百計上考陣圖以問入奏使使者言砦兵拒賊千餘步慶香等請率部族與賊接戰上曰慶香等假王師為援而交鋒俘獲乃其功也悉與所獲物加賜銀綵以慶香領順州刺史癿都慶領羅州刺史河西內屬折勒厥麻等三族請以精兵千人馬三百備征討詔

嵐州撫諭環州白馬族與繼遷戰鬪屢徙帳乏食賜廩
粟又詔洪德砦歸附戎人給內地土田資以口糧五月
唐龍鎮上言鎮有貿易于府州者為州人邊殺盡奪資
畜乃詔府州自今許令互市切加存撫六月瓦窯沒劑
加羅昧克等族濟河擊敗繼遷黨優詔撫問七月補狸
野族首領子阿宜為懷安將軍八月原渭等州言本界
戎人來附者八部二十五族今詣吏納質以環州蘇尚
娘子孽娘為臨州刺史府州八族都校明義等言屢于

麟州屈野川擊繼遷及緣邊六七柵防遏皆有克獲詔
獎賚之仍令府州常以勁兵援助勿失機便景德元年
正月麟府路言附契丹戎人言泥族拔黃太尉率三百
餘帳內屬拔黃本大族居黃河北古豐州前數犯邊阻
市馬之路其首領容貌甚偉有智勇桀黠難制契丹結
之署為太尉令悉衆款塞詔府州厚賜茶綵給公田依
險居之計口賦粟且戒唐龍鎮無得侵擾三月宋師恭
破羌賊於柳谷川驅其帳族千餘人以還六月洪德砦

言羌俗羅泥天王等首領率屬來附八月野雞族侵掠
環慶界詔邊臣和斷如其不從則脅以兵威九月鎮戎
軍言先叛去熟魏族酋長茄羅兀贊成王等三族應詔
撫諭各率屬來歸二年熟戶旺家族擊夏兵擒軍主一
人以獻環州言戎人入寇擊走之擒酋長慶都送闕下
請斬于藁街上特貰死配淮南原州野狸族首領廝多
逋丹卒其子阿酌代為首領且乞奉料詔諭以立功則
賜之三年府州折惟昌言兀泥族大首領名崖從父盛

信為趙德明白池軍主密遣使諭名崖云德明雖外託修貢之名而點閱兵馬尤急必恐劫掠山界名崖以告上嘉之降詔撫諭就賜錦袍銀帶九月秦州言野兒和尚族部落尤大能稟朝命凡諸族為寇盜者輒遏絕之請加旌別詔補三砦都首領十一月鎮戎軍曹瑋言叛去酋長蘇尚娘復求歸附詔報瑋曰尚娘反覆無信特恐沮詐以誤邊吏又使德明緣此為詞不可納也四年唐龍鎮羌族來美與其叔璘不叶召契丹破之來依府

州璘美非大族常持兩端頃亦寇鈔近界發兵趣之則走河之東曰東壘契丹加兵則入河之西曰西壘地極險阻介卒騎兵所不能及至是上亦憫其窮而欵塞特優容之會契丹使至即令諭其事仍還所掠璘美人畜其族人懷正又與璘互相讎劫側近帳族不寧詔遣使召而盟之依本俗法和斷大中祥符元年鄜延鉞轄言小湖卧浪族軍主最處近塞往時出師皆命為前鋒甚著誠節詔補侍禁二年六月璘府鉞轄言杜慶族依援

唐龍鎮數侵別帳請發熟戶兵擊之上曰戎落皆吾民也宜以道撫之不許其年兀泥族大首領名崖同府州折惟昌入貢上親加撫問特詔副都知張繼能賜射於瓊林苑四年藏才西族中族首領奴移橫全等並遣子來朝五年環慶熟戶有酗酒劫奪使臣馬纓者上怒令部署司重罰之六年边界尅山軍主率重過大里河侵熟戶為羅勒族都囉擊走之詔以都囉為本族指揮使且諭邊臣約飭族帳謹守疆界勿出境追襲九月夏州

畧去熟戶旺家族首領都子等來歸隨而至者又三族遣使存勞之七年涇原銓轄曹瑋請署熟戶百帳以上大首領為大族軍主次指揮使又次副指揮使百帳而下為本族指揮使從之五月瑋言葉市族大首領艷奴歸順七月瑋又言壯界萬子族謀鈔畧發兵逆之大敗于天麻川又為魏埋等族掩擊殺其酋帥斬首千餘級八年壯界酋長指揮使浪梅娘等來投諭邊臣令追取熟戶亡入壯界者即遣還梅娘九年羌兵寇小力族巡

檢李文貞率兵奮擊追斬籍遇大保首級賜文貞錦袍
銀帶五月北界毛戶族軍主浪埋骨咩族酋長癿唱巢
迷族酋長馮移埋率其屬千一百九十四口牛馬雜畜千
八百歸附降詔撫之天禧元年環州言北界騎兵數千
來剽熟戶擊走之二年涇原路言樊家族九門都首領
客廝鐸內屬以廝鐸為軍主三年鄜延路言亡去熟戶
委乞等六百九十五人及骨咩大門等族來歸四年正
月又言宥州羌族臘兒率衆劫熟戶咩魏族金明都監

李士彬擊之斬臘兒梟七十二級俘餘衆獲甲馬三百
餘五月小湖族都虞候喏嵬巡檢胡懷節等擊賊有功
竝進秩環州七白族軍主近贛納質歸化以近贛領順
州刺史首領惹都等十五人補官有差七月撲咩族馬
訛等率屬來附十月以淮安鎮六族都軍主乞埋為三
班借職充羌部巡檢五年北界羅骨等劫剽熟戶環慶
部署田敏追擊之俘獲甚衆詔獎敏等賜器幣

宋史卷四百九十一

欽定四庫全書

欽定四庫全書 舊要卷六千一百二十

史部

宋史卷四百九十二

元中書右丞相總裁托克托等修

列傳第二百五十一

外國八

吐蕃

唃廝囉
曉征

董
韁
趙思忠

阿里骨

吐蕃本漢西羌之地其種落莫知所出或云南涼禿髮利鹿孤之後其子孫以禿髮為國號語訛故謂之吐蕃

唐貞觀後常來朝貢至德後因安史之亂遂陷河西隴右之地大中三年其國宰相論恐熱以秦原安樂及石門等七關來歸四年又克成維扶三州五年其國沙州刺史張義潮以瓜沙伊肅十一州之地來獻唐末瓜沙之地復為所隔然而其國亦自衰弱族種分散大者數千家小者百十家無復統一矣自儀渭涇原環慶及鎮戎秦州暨于靈夏皆有之各有首領內屬者謂之熟戶餘謂之生戶涼州雖為所隔然其地自置牧守或請命

於中朝天成中權知西涼府留後孫超遣大將拓跋承
誨來貢明宗召見承誨云涼州東距靈武千里西北至
甘州五百里舊有鄆人二千五百為戍兵及黃巢之亂
遂為阻絕超及城中漢戶百餘皆戍兵之子孫也其城
今方幅數里中有縣令判官都押衙都知兵馬使衣服
言語畧如漢人即授超涼州刺史充河西軍節度留後
乾祐初超卒州人推其土人折逋嘉施權知留後遣使
來貢即以嘉施代超為留後涼州郭外數千里尚有漢

民陷沒者耕作餘皆吐蕃其州帥稍失民情則衆皆嘯聚城內有七級木浮圖其帥急登之紿其衆曰爾若迫我我即自焚於此矣衆惜浮圖乃盟而舍之周廣順三年始以申師厚為河西節度師厚初至涼州奏請授吐蕃首領折逋支等官並從之顯德中師厚為其所迫擅還朝坐貶涼州亦不復命帥建隆二年靈武五部以橐駝良馬致貢來離等八族酋長越嵬等護送入界勅書獎諭秦州首領尚波干傷殺采造務卒知州高防捕繫

其黨四十七人以狀聞上乃以吳廷祚為雄武軍節度
代防安輯之令廷祚齋勅書賜尚波干等曰朝廷制置
邊防撫寧部落務令安集豈有侵漁曩者秦州設置三
砦止以采取材木供億京師雖在蕃漢之交不妨牧放
之利汝等占據木植傷殺軍人近得高防奏汝等見已
拘執聽候進止朕以汝等久輸忠順必悔前非特示懷
柔各從寬宥已令吳廷祚往伸安撫及還舊地所宜共
體恩旨各歸本族仍以錦袍銀帶賜之尚波干等感悅

是年秋乃獻伏羌地乾德四年知西涼府折逋葛支上
言有回鶻二百餘人漢僧六十餘人自朔方路來為部
落劫畧僧云欲徃天竺取經並送達甘州訖詔褒答之
五年首領問逋哥督廷督南割野麻里六人來貢馬開
寶六年涼州令步奏官僧吝羣聲逋勝拉蠲二人求通
道於涇州以申朝貢詔涇州令牙將至涼州慰撫之八
年秦州大石小石族寇土門畧居民知州張炳擊走之
太平興國二年秦州安家族寇長山巡檢使韋韜擊走

之三年秦州諸族數來寇畧三陽麻穰弓門等砦監軍
巡檢使周承瑨任德明耿仁恩等會兵擊敗之斬首數
十級腰斬不用命卒九人于境上太宗乃詔曰秦州內
屬三族等頃慕華風聿求內附俾之安輯咸遂底寧近
聞乘蕃育之資稔寇攘之志敢忘大惠來撓邊疆豈朕
信之未孚而吏撫之不至並蠲釁咎特示威懷今後或
更剽剝吏即捕治寘之于法不須以聞是年又寇八狼
砦巡檢劉崇讓擊敗之梟其帥王泥猪首以徇三月小

遇族寇慶州知州慕容德豐擊走之八年諸種以馬來獻太宗召其酋長對于崇政殿厚加慰撫賜以東帛因謂宰相曰吐蕃言語不通衣服異制朕常以禽獸畜之自唐室以來頗為邊患以國家兵力雄盛聊舉偏師便可驅逐數千里外但念其種類蕃息安土重遷倘因攘除必致殺戮所以置於度外存而勿論也九年秋秦州言蕃部以羊馬來獻各以宴犒欲用茶絹答其直詔從之淳化元年秦州大小馬家族獻地內附二年權知西

涼州左廂押蕃落副使折逋阿喻丹來貢先是殿直丁
惟清往涼州市馬惟清至而境大豐稔因為其所留靈
州命蕃落軍使崔仁遇往迎惟清又吐蕃賣馬還遇靈
州為黨項所畧表訴其事因請留惟清至來年同入朝
詔答之四年阿喻丹死以其弟喻龍波為保順郎將代
其任五年折平族大首領護遠州軍鑄督延巴率六谷
諸族馬千餘匹來貢既辭復樞登聞鼓言儀州八族首
領逋波鶻等侵奪地上降勅書告諭之知秦州溫仲

舒上言每歲伐木多為蕃族攘奪今已驅其部落於渭北太宗慮生邊患乃以知鳳翔薛惟吉對易其任語見惟吉傳是年春知西涼府左廂押蕃落副使折逋喻龍波振武軍都羅族大首領並來貢馬至道元年涼州蕃部當尊以良馬來貢引對慰撫加賜當尊虎皮一歡呼致謝二年四月折平族首領握散上言部落為李繼遷所侵願會兵靈州以備討擊賜幣以答之七月西涼府押蕃落副使折逋喻龍波上言蕃部頻為繼遷侵畧乃

與吐蕃都部署沒暇拽子會六谷蕃衆來朝且獻名馬
上厚賜之是歲涼州復來請帥詔以丁惟清知州事賜
以牌印咸平元年十一月河西軍左廂副使歸德將軍
折逋游龍鉢來朝游龍鉢四世受朝命為酋雖貢方物
未嘗自行今始至獻馬二千餘匹河西軍即古涼州東
至故原州千五百里南至雪山吐谷渾蘭州界三百五
十里西至甘州同城界六百里北至部落三百里周回
平川二千里舊領姑臧神鳥蕃禾昌松嘉麟五縣戶二

萬五千六百九十三口十二萬八千一百九十三令有
漢民三百戶城周回十五里如鳳形相傳李軌舊治也
皆龍鉢自述云詔以龍鉢為安遠大將軍二年以儀州
延蒙八部都首領渴哥領化州刺史首領透逋等為懷
化郎將四年知鎮戎軍李繼和言西涼府六谷都首領
潘羅支願戮力討繼遷請授以刺史仍給廩祿經畧使
張齊賢又請封六谷王兼招討使上以問宰相皆曰羅
支已為酋帥授刺史太輕未領節制加王爵非順招討

使號不可假外夷乃以為鹽州防禦使兼靈州西面都
巡檢使時西涼使來且言六谷分左右廂左廂副使折
逋游龍鉢實參羅支戎事朝廷方務綏懷又以龍鉢領
宥州刺史六族首領褚下箕等三人為懷化將軍其年
潘羅支遣部下李萬山率兵討賊貽書繼和請師期先
是遣宋沆梅詢等為安撫副使未行上謂宰相曰朕看
盟會圖頗記吐蕃反覆狼子野心之事今已議王超等
領甲馬援靈州若難為追襲即靈州便可制置沆等不

須遣止走一使以會兵告之五年十月羅支又言賊遷送鐵箭誘臣部族已戮一人繫一人聽朝旨詔褒諭之聽自處置十一月使來貢馬五千匹詔厚給馬價別賜絲百段茶百斤六年又遣咩逋族蕃官成逋馳騎至鎮戎軍請會兵討賊邊臣疑成逋詐護送部署司成逋懼逸馬墜崖死上聞甚歎息之曰此泥埋之子族人畏其勇父子皆有戰功凡再詣闕朕皆召見獎其向化詔勅鎮戎官吏仍令渭州以禮葬之其年原渭蕃部三十二

族納質來歸羅支又遣蕃官吳福聖臘來貢表言感朝
廷恩信憤繼遷倔彊已集騎兵六萬乞會王師收復靈
州乃以羅支為朔方軍節度靈州西面都巡檢使賜以
鎧甲器幣又以吳福聖臘為安遠將軍次首領元佐等
七人為懷化將軍羅支屢請王師助擊賊議者以西涼
去渭州限河路遠不可預約師期上曰繼遷常在地斤
三山之東每來寇邊及官軍出則已遁去使六谷部族
近塞捍禦與官軍合勢亦國家之利降詔許之六月知

渭州曹瑋言隴山西延家族首領禿逋等納馬立誓乞隨王師討賊以漢法治蕃部且稱其忠詔授本族軍主八月者龍族首領來貢名馬上嘉嘗與潘羅支協力抗賊令復優待之其年十一月繼遷攻西蕃遂入西涼府知州丁惟清陷沒羅支偽降未幾集六谷諸豪及者龍族合擊繼遷繼遷大敗中流矢遁死景德六年二月遣其甥廝陀完來獻捷六月又遣其兄邦逋支入奏且欲更率部族及回鶻精兵直抵賀蘭山討除殘孽願發大

軍援助詔涇原部署陳興等候羅支已發即率衆鼓行
赴石門策應邦逋支又言前賜羅支牌印官告衣服器
械為賊劫掠有詔別給羅支又言脩洪元大雲寺詔賜
金箔物綠先是繼遷種落迷般囑及日逋吉羅丹二族
亡歸者龍族而欲陰圖羅支是月會遷黨攻者龍羅支
率百餘騎急赴將議合擊遂為二族戕于帳詔贈羅支
武威郡王遣使贈恤其家者龍凡十三族而六族附迷
般囑及日逋吉羅丹西涼府既聞羅支遇害乃率龕谷

蘭州宗哥覓諾諸族攻者龍六族六族悉竄山谷中詔
使者安集之六谷諸豪乃議立羅支弟廝鐸督為首領
且言鐸督剛決平恕每會戎首設觴豆飲食必先卑者
犯令雖至親不貸數更戰討威名甚著詔授鐸督鹽州
防禦使靈州西面沿邊都大巡檢使上以遷黨未平藉
其腹背攻制遂加鐸督朔方軍節度押蕃落等使西涼
府六谷大首領涇原路言隴山縣王狸延三族歸順又
渭州言龕谷懶家族首領尊擅磨壁余龍及便囑等獻

名馬願率所部助討不附者又言西涼市馬道出本族
自今保無他虞詔賜馬直以便囑等為郎將石隰州又
言河西諸蕃四十五族內附其年遷黨寇永寧為藥令
族合蘇擊敗之斬首百餘級鎮戎軍上言先叛去蕃官
朮羅兀贊成王等三族及移移軍主率屬歸順請獻馬
贖罪特詔宥之二年廝鐸督遣其甥呵昔來貢仍上與
趙德明戰鬪功狀又言蕃帳周斯那支有智勇又參謀
議請授以六谷都巡檢使上嘉獎從其請仍賜茶綵又

追錄潘羅支子失吉為歸德將軍厚賜器幣者龍七族
首領有捍寇之勞並月給千錢舊制弓矢兵器不入外
夷時西涼樣丹族上表求市弓矢上以樣丹宣力西陲
委以捍蔽特令渭州給賜因別賜廝鐸督以重恩意三
年又以者龍族合窮波黨宗族業羅等為本族首領檢
校太子賓客皆鐸督外姻也鐸督遣安化郎將路黎奴
來貢黎奴病于館特遣尚醫視療及卒上憐之厚加賵
給五月鐸督又言部落疾疫詔賜白龍犀角腦疏黃安

息香白紫石英等藥凡七十六種使者感悅而去又制
加鐸督檢校太傅其族帳李波逋等四十九人為檢校
太子賓客充本族首領鐸督遣所部波機進賣馬因言
積官奉半歲乞就京給賜市所須物從之渭州言妙城
延家熟嵬等族率三千餘帳萬七千餘口及羊馬數萬
欵塞內附詔遣使撫勞之賜以袍帶茶綵仍以折平族
首領撤逋渴為順州刺史充本族都軍主是年宗家當
宗章迷族來貢移逋擦父族歸附九月詔釋西面納質

戎人先是諸蕃有鈔劫為惡嘗經和斷者恐異時復叛故收其子弟為質乃有禁錮終身者上憫而縱之族帳感恩皆稽颡自誓不為邊患四年邊臣言趙德明謀劫西涼襲回鶻上以六谷甘州久推忠順思撫寧之乃遣使諭廝鐸督令援結回鶻為備并賜鐸督茶藥襲衣金帶及部落物有差鐸督奉表謝大中祥符元年十一月宗哥族大首領溫逋等來貢三年西涼府覓諾族瘴疫賜首領溫逋等藥四年廝鐸督遣僧闍籠單來貢賜紫

方袍五年又遣其子來貢其年者龍族都首領捨欽波
遣使詣闕獻馬求賜印詔從其請仍優賚之七年知秦
州張佶置大落門新砦先是佶欲近渭置采木場蕃族
聞之即徙帳去佶不能遂撫之戎人輒悔因鄉導鈔劫
佶深入掩擊悉敗走至是求和佶不許三月秦州曹瑋
言熟戶郭廝敦賞樣丹皆大族樣丹輒作文法謀叛廝
敦密以告約半月殺之至是果擒樣丹首來上以廝敦
陰害樣丹不欲明加恩獎以疑懼諸族時方議築南使

城遂以廝敦獻地為名詔授順州刺史先是張佶深入
蕃境邊事數擾及璋破魚角蟬戮賞樣丹二酋由是前
拒王師者伏匿避罪璋誘召之許納罰首過既而至者
數千人凡納馬六千匹給以匹絲或以少為訴者璋叱
之曰是贖罪物汝輩敢希利耶戎族聞之皆畏服八月
曹璋言伏羌砦廝鷄波與宗哥族李磨論聚為文法領
兵趣之悉潰散夷其城帳九月璋又言宗哥唃廝囉羌
族馬波叱臘魚角蟬等率馬銜山蘭州龕谷龜毛山洮

河河州羌兵至伏羌砦三都谷即率兵擊敗之逐北二十里斬馘千餘級擒七人獲馬牛雜畜衣服器仗三萬三千計吹麻城張族都首領張小哥以功授順州刺史瑋又言永寧砦隴波他廝麻二族名納質不從命率兵擊之斬首二百級十一月詔給秦州七砦熟戶首領都軍主以下百四十六人告身天禧元年詔以治坊砦都首領郭廝敦為本族巡檢賦以奉祿又補大馬家族阿廝鐸為本族軍主十月秦州部署言鬼留家族累歲違

命討平之二年又言吹麻城及河州諸族皆破宗哥文法來附唃廝囉少衰數為囉瞎力骨所困今還舊地諸砦羌族及空俞廝雞波等納質者凡七百五十六帳

唃廝囉者緒出贊普之後本名欺南陵溫錢逋錢逋猶贊普也羌語訛為錢逋生高昌磨榆國既十二歲河州羌何郎業賢客高昌見廝囉貌奇偉挈以歸置劙心城而大姓聳昌廝均又以廝囉居移公城欲於河州立文法河州人謂佛唃謂兒子廝囉自此名唃廝囉於是宗

哥僧李立遵邈川大酋溫逋哥畧取廝囉如郭州尊立
之部族寢彊乃徙居宗哥城立遵為論逋佐之立遵或
曰李遵或曰李立遵又曰郢成蘭逋叱論逋者相也立
遵貪且喜殺戮國人不附既與曹瑋戰三都谷不勝又
襲西涼為所敗廝囉遂與立遵不協更徙邈川以溫逋
哥為論逋有勝兵六七萬與趙德明抗希望朝廷恩命
知泰州張佶奏請拒絕涇原鈴轄曹瑋上言宜厚啗廝
囉以扼德明而立遵屢表求贊普號朝議以贊普戎王

也立遵居廝囉下不應妄子乃用廝鐸督恩例授立遵
保順軍節度使賜襲衣金帶器幣鞍馬鎧甲等大中祥
符八年廝囉遣使來貢詔賜錦袍金帶器幣供帳什物
茶藥有差凡中金七千兩他物稱是其年廝囉立文法
聚衆數十萬請討平夏以自效上以戎人多詐或生他
變命周文質監涇原軍曹瑋知秦州兼兩路沿邊安撫
使以備之宗哥城東南至永寧九百一十五里東北至
西涼府五百里西北至甘州五百里東至蘭州三百里

南至河州四百一十五里又東至龕谷五百五十里又西南至青海四百里又東至新渭州千八百九十里九年廝囉立遵等獻馬五百八十二匹詔賜器幣總萬二千計以答之數使人至秦州求內屬明道初即授廝囉寧遠大將軍愛州團練使授逋哥歸化將軍已而逋哥為亂囚廝囉置穿中出收不附已者守穿人間出之廝囉集兵殺逋哥徙居青唐景祐中以廝囉為保順軍節度觀察留後歲以奉錢令秦州就賜元昊侵畧其界兵

臨河湟廝囉知衆寡不敵壁鄯州不出陰間元昊頗得其虛實元昊已渡河挿幟志其淺廝囉潛使人移植深處以誤元昊及大戰元昊潰而歸士視幟渡溺死十八九所鹵獲甚衆自是數以奇計破元昊遂不敢窺其境及元昊取西涼府潘羅支舊部往往歸廝囉又得回紇種人數萬廝囉居鄯州西有臨谷城通青海高昌諸國商人皆趨鄯州貿賣以故富強寶元元年加保順軍節度使仍兼邈川大首領時以元昊反遣左侍禁魯經持

詔諭廝囉使背擊元昊以披其勢賜帛二萬匹經還以
勞擢閣門祗候廝囉奉詔出兵嚮西涼西涼有備廝囉
知不可攻捕殺遊邏數十人亟還聲言圖再舉元昊既
屢寇邊仁宗召對魯經欲再遣經固辭貶經為左班殿
直幕敢使者屯田員外郎劉渙應詔渙至廝囉迎導供
帳甚厚介騎士為先驅引渙至庭廝囉冠紫羅氈冠服
金線花袍黃金帶絲履平揖不拜延坐勞問稱阿舅天
子安否道舊事則數十二辰屬曰兔年如此馬年如此

渙傳詔已而廝羅召酋豪大犒約盡力無負然終不能
有大功後累加恩兼保順河西節度使洮涼兩州刺史
又加階勛檢校官功臣食邑賜器幣鞍勒馬嘉祐三年
捺羅部阿作等叛廝羅歸諒祚諒祚乘此引兵攻掠境
上廝羅與戰敗之獲酋豪六人收橐駝戰馬頗衆因降
隴逋公立馬頗三大族會契丹遣使送女妻其少子董
璫乃罷兵歸治平二年夏羌邈奔及阿叔溪心以隴珠
阿諾三城叛諒祚歸廝羅廝羅不禮乃復歸諒祚請兵

還取所獻地諒祚不之罪為出萬餘騎隨邈奔溪心往
取不能克但取邈川歸丁家五百餘帳而還廝囉其年
冬死年六十九第三子董龜嗣

董龜母曰喬氏廝囉三妻喬氏有色居歷精城所部可
六七萬人號令明人憚服之方董龜少時擇箇長子年
與董龜相若者與之遊衣服飲食如一以此能附其衆
董龜自九歲廝囉為請于朝命為會州刺史而喬氏封
太原郡君其二妻皆李立遵女也生瞎龜及磨龜角立

遵死李氏寵衰斥為尼置郭州錮其子瞎龜磨龜角結母黨李巴全竊載其母奔宗哥廝囉不能制磨龜角因撫有其衆李氏以寶元二年恩賜紫衣磨龜角亦累奉貢初補嚴州團練使後以恩州團練使卒所部立其子瞎撒欺丁李氏懼孤弱不能守乃獻皮帛入庫廩文籍于廝囉廝囉因受之嘉祐三年命欺丁為順州刺史瞎龜居龜谷屢通貢授澄州團練使先卒子木征居河州母弟瞎吳叱歸銀川廝囉地既分董龜最彊獨有河北

之地其國大抵吐蕃遺俗也懷恩惠重財貨無正朔市
易用五穀乳香硝砂罽毬馬牛以代錢帛貴虎豹皮用
緣飾衣裘婦人衣錦服緋紫青綠尊釋氏不知醫藥疾
病召巫覲視之焚柴聲鼓謂之逐鬼信呪詛或以決事
訟有疑使詛之訟者上辭牘籍之以帛事重則以錦亦
有鞭笞杻械諸獄具人喜啖生物無蔬茹醯醬獨知用
鹽為滋味而嗜酒及茶居板屋富姓以氈為幕多並水
為鞶韁戲貢獻謂之般次自言不敢有貳則曰心白向

漢云其後河州武勝軍諸族寢驕閉于闐諸國朝貢道
擊奪般次詔邊將問罪已而董彊遣使奉貢入謝上慰
納焉初廝囉死董彊嗣為保順軍節度使檢校司空神
宗即位加太保進太傅熙寧元年封其母安康郡太君
以其子蘭逋比為錦州刺史三年夏人寇環慶董彊乘
虛入其境大克獲賜璽書袍帶獎激之王韶既定熙河
其首領青宜結鬼章寇河州踏白城景思立死焉帝命
邊臣招來之十年以鬼章及阿里骨皆為刺史董彊貢

真珠乳香象牙玉石馬賜以銀絲茶服緡錢改西平節
度使遣供奉官郭英齋詔書器幣至其國方鬼章犯境
時列帳訥兒溫及祿尊率部族叛附之既來降又陰與
董氊通元豐初詔知岷州种誘集酋長斬之以妻女田
產賜降將俞龍河二年遣景青宜黨令支貢方物以令
支為珍州刺史賜董氊錢萬緡銀絲千計三年邈川城
主溫訥支郢成及叔溪心弟阿令京等欵塞以郢成為
會州團練使溪心內殿崇班令京西頭供奉官餘族人

皆殿直奉職四年王師討夏會其兵董彊遣酋長抹征等率三萬人赴黨龍耳江及隴朱珂諾又集六部兵十二萬約以八月分三路與官軍會帝以其協濟軍威事功可紀由常樂郡公進封武威郡王鬼章阿里骨黨令支皆團練使心牟欽彊阿星李叱臘欽為刺史夏人欲與之通好許割賂斫龍以西地云如歸我即官爵恩好一如所欲董彊拒絕之訓整兵甲以俟入討且遣使來告帝召見其使使歸語董彊盡心守圉每稱其上書情

辭忠智雖中國士大夫存心公家者不過如此知邈川
事力固不足與夏人抗但欲解散其謀使不與結和而
已故終不能大有功哲宗立加檢校大尉元祐元年卒
諱道叱已死養子阿里骨嗣

阿里骨本于闐人少從其母給事董韞故養為子元豐
蘭州之戰最有功自肅州團練使進防禦使董韞病革
召諸酋領至青唐謂曰吾一子已死惟阿里骨母嘗事
我我視之如子今將以種落付之何如諸酋聽命既嗣

事遣使脩貢元祐元年以起復冠軍大將軍檢校司空
為河西軍節度使封寧塞郡公里骨頗峻刑殺其下不
遑寧詔飭以推廣恩信副朝廷所以封立前人所以付
與之意二年遂逼鬼章使率衆拒洮州羌結藥密者使
所部怯陵來告里骨執怯陵結藥密懼攜妻子南歸鬼
章又使其子結咅覲入寇心牟欽擅溫溪心不肯從詔
以二人為團練使八月鬼章就擒檻送京師尋赦之授
陪戎校尉遣居秦州聽招其子以自贖明年里骨奉表

謝罪詔熙河無復出兵許貢奉如故加金紫光祿大夫
檢校太保其郭州主魯尊欲焚折河橋歸漢熙州以聞
哲宗以里骨既通貢不可有納叛之名欲弗納又封其
妻溪尊勇丹為安化郡君子邦彪籤為鄯州防禦使弟
南納支為西州刺史鬼章死詔焚付其骨紹聖元年以
師子來獻帝慮非其土性厚賜而還之三年卒年五十

七 賈征嗣

賈征即邦彪籤也以紹聖四年正月為河西軍節度使

檢校司空寧塞郡公性嗜殺部曲睽貳大酉心牟欽龜
之屬有異志忌瞎征季父蘇南黨征雄勇多智共誣其
謀遂瞎征不能察而殺之盡誅其黨獨錢羅結逃奔溪
巴溫溪巴溫者董龜疎族也自阿里骨之立去依隴逋
部河南諸羌多歸之錢羅結奉溪巴溫長子杓櫻據溪
哥城瞎征討殺杓櫻錢羅結奔河州說王贍以取青唐
之策已而溫入溪哥城自稱王子元符二年七月贍取
邈川八月瞎征自青唐脫身來降欽龜迎溪巴溫入青

唐立木征之子隴拶為主九月贍軍至青唐隴拶出降
以邈川為湟州青唐為鄯州二酋雖降然其種人本無
歸漢意議者謂今不先脩邈川以東城障而遽取青唐
非計也以今日觀之有不可守者四自炳靈寺渡河至
青唐四百里道險地遠緩急聲援不相及一也羌若斷
橋塞隘我雖有百萬之師倉卒不能進二也王贍提孤
軍以入四無援兵必生他變三也設遣大軍而青唐宗
哥邈川食皆止支一月內地無糧可運難以久處四也

官軍自會州還者皆憔悴衣屢穿決器仗不全羌視之有輕漢心旦夕必叛閏九月欽磾等果與青唐城中人相結謀復奪城山南諸羌亦叛贍遣將破之戮結吼齦及欽磾等九人青唐圍解而邈川益急夏人十萬助之總管王愍以死戰固守乃得免贍棄青唐歸巴溫與其子溪賒羅撒據之朝論請并棄邈川且謂董磾無後隴拶乃木征之子唃廝囉嫡曾孫最為親的於是以隴拶為河西軍節度使知鄯州封武威郡公充西蕃都護依

府州折氏世世承襲尋賜姓名曰趙懷德其弟邦咷勿
丁咷曰懷義為廓州團練使同知湟州加瞎征校尉太
傅懷遠軍節度使三年三月懷德及所降契丹夏國回
鶻公主入見各賜冠服退易之于邇英閣前後立班謝
賜食於橫門徽宗命輔臣呼與語問何以招致溪巴溫
對曰譬如乳牛繫其子即母須來繫其母即子須來俟
至岷州當遣人往諭使之歸漢遂與瞎征俱還湟州溪
賊羅撒謀襲殺懷德懷德奔河南瞎征不自安求內徙

詔居鄧州崇寧元年卒三年王厚復惶懼德至京師拜感軍節度使封安化郡王

趙思忠即瞎龜之子木征也瞎龜死木征不能自立青唐族酋瞎藥雞囉及僧鹿遵迎之居洮州欲立以復洮岷疊宕武勝軍諸羌秦州以其近邊逐之乃還河州後徙安江城董氈欲羈屬之不能有也母弟瞎吳叱別居銀川有聾家山至和初補本族副軍主嘉祐中河州刺史王韶經畧熙河遣僧智圓往說之啖以厚利因隨以

兵前後殺其老弱數千焚族帳萬數得腹心首領十餘人又禽其妻子皆不殺遂以熙寧七年四月舉洮河二州來降賜以姓名拜榮州團練使封其母郢成結遂寧郡太夫人妻包氏咸寧郡君弟董谷賜名繼忠補六宅副使結吳延征賜名濟忠瞎吳叱曰紹忠巴氈角曰醇忠巴氈抹曰存忠長子邦辟勿丁吼曰懷義次蓋吼曰秉義皆超拜官以思忠為秦州鈴轄不蒞事而乞主熙河羌部經畧司以為不可詔以二州給地五十頃後遷

合州防禦使卒贈鎮洮軍節度觀察留後

宋史卷四百九十二

謹案卷四百九十一第六頁前二行東興州產黃
金刊本產訛差據通考改

第十三頁前四行賜木吉治裝錢遣還刊本治訛
時據監本改





總校官庶吉士臣張能照

校對官檢討臣盧應
騰錄監生臣趙立福

欽定四庫全書叢要

史部

宋史卷四百九十三

詳校官編修臣王天祿



欽定四庫全書會要卷六千一百二十一

史部

宋史卷四百九十三

元中書右丞相總裁托克托等修

傳第二百五十二

蠻夷一

西南溪峒諸蠻上

古者帝王之勤遠略耀兵四裔不過欲安內而捍外爾
非所以求逞也西南諸蠻夷重山複嶺雜廁荆楚巴黔

巫中四面皆王土乃欲揭上腴之征以取不毛之地疲易使之衆而得梗化之氓誠何益哉樹其酋長使自鎮撫始終蠻夷遇之斯計之得也然無經久之策以控馭之狃鼯之性便於跳梁或以讐隙相尋或以饑饉所逼長嘯而起出則衝突州縣入則負固山林致煩興師討捕雖能殄除而斯民之荼毒深矣宋恃文教而略武衛亦豈先王制荒服之道哉西南溪峒諸蠻皆盤瓠種唐虞為要服周世其衆彌盛宣王命方叔伐之楚莊既霸

遂服於楚秦昭使白起伐楚略取蠻夷置黔中郡漢改
為武陵後漢建武中大為寇鈔遣伏波將軍馬援等至
臨沅擊破之渠帥饑困乞降歷晉宋齊梁陳或叛或服
隋置辰州唐置錦州溪州巫州叙州皆其地也唐季之
亂蠻酋分據其地自署為刺史晉天福中馬希範承襲
父業據有湖南時蠻猺保聚依山阻江殆十餘萬至周
行逢時數出寇邊逼辰永二州殺掠民畜無寧歲太祖
既下荆湖思得通蠻情習險阨勇智可任者以鎮撫之

有辰州猺人秦再雄者長七尺武健多謀在行逢時屢以戰鬪立功蠻黨伏之太祖召至闕下察其可用擢辰州刺史官其子為殿直賜予甚厚仍使自辟吏屬予一州租賦再雄感恩誓死報効至州日訓練土兵得三千人皆能被甲渡水厯山飛慙捷如猿猱又選親校二十人分使諸蠻以傳朝廷憚來之意莫不從風而靡各得降表以聞太祖大喜復召至闕面加獎激改辰州團練使又以其門客王允成為辰州推官再雄盡瘁邊圉五

州連袤數千里不增一兵不費帑庾終太祖世邊境無
患又有溪州刺史彭士愁等以溪錦獎州歸馬氏立銅
柱為界建隆四年知溪州彭允林前溪州刺史田洪賛
等列狀歸順詔以允林為溪州刺史洪賛為萬州刺史
允林卒以其子師皎代為刺史四月水鬪都虞候林抱
義上辰叙二州圖乾德二年四月溪叙獎等州民相攻
劫遣殿直牛允齋詔諭之乃定三年七月珍州刺史田
景干內附五溪團練使涪州刺史田處崇上言湖南節

度馬希範建叙州潭陽縣為懿州署臣叔父萬盈為刺
史希範卒其弟希萼襲位改為涪州願復舊名詔從其
請十二月詔溪州宜充五溪團練使刻印以賜之四年
南州進銅鼓內附下溪州刺史田思遷亦以銅鼓虎皮
麝臍來貢五年冬以溪州團練使彭允賢為濮州牢城
都指揮使溪州義軍都指揮使彭允賢為衛州牢城都
指揮使珍州錄事參軍田思曉為博州牢城都指揮使
允足等溪峒酋豪據山險持兩端故因其入朝而置之

內地開寶元年珍州刺史田景遷言本州連歲災沴乞
改為萬州從之八年景遷卒其子衙內都指揮使彥伊
來請命即以為刺史九年獎州刺史田處達以丹砂石
英來貢太平興國二年懿州刺史五溪都團練使田漢
瓊以其子弟女夫大將五溪統軍都指揮使田漢度而
下十二人來貢詔並加檢校官以獎之三年夷州蠻任
朗政等來貢七年詔辰州不得移部內馬氏所鑄銅柱
溪州刺史彭允殊上言刺史舊三年則為州所易望朝

廷禁止賜勅書安撫之八年錦溪叙富四州蠻相率詣
辰州言願比內郡輸租稅詔長吏察其謠俗情偽并按
視山川地形圖畫來上卒不許懿州刺史田漢瓊錦州
刺史田漢希上言願兩易其地詔從之又以知叙州舒
德郭為刺史雍熙元年黔南言溪峒夷獠疾病擊銅鼓
沙鑼以祀神鬼詔釋其銅禁淳化二年知晃州田漢權
言本管砂井步夷人栗忠獲古晃州印一鉢來獻因請
命以漢權為晃州刺史又以五溪諸州統軍鶴州刺史

向通漢為富州刺史從其請也是年荆湖轉運使言富
州向萬通殺皮師勝父子七人取五藏及首以祀魔鬼
朝廷以其遠俗令勿問三年晃州刺史田漢權錦州刺
史田保全遣使來貢五年以舒德鄆言為元州刺史獎
晃叙懿元錦費福等州皆來貢上親視器幣以賜之至
道元年高州溪州並來貢二年上親祀南郊富州刺史
向通漢上言聖人郊祀恩溥天壤況五溪諸州連接十
洞控西南夷戎之地惟臣州自昔至今為辰州牆壁障

護辰州五邑王民安居臣雖僻處遐荒洗心事上伏望
陛下察臣勤王之誠因茲郊禮特加真命詔加通漢檢
校司徒進封河內郡侯咸平元年通漢又言請定租賦
真宗以荒服不征弗之許其年古州刺史向通展以美
容朱砂二器馬十匹水銀千兩來獻詔有司鑄印以賜
通展二年以下溪州刺史彭允殊為右千牛衛將軍致
仕以其姪文勇為刺史三年高州刺史田彥伊遣子貢
方物及輸兵器四年其酋向君猛又遣弟君泰來朝上

溪州刺史彭文慶來貢水銀黃蠟五年正月天賜州蠻向永豐等二十九人來朝夔州路轉運使丁謂言溪蠻入粟實緣邊砦柵頓息施萬諸州饋餉之弊臣觀自昔和戎安邊未有境外轉糧給我戍兵者先是蠻人數擾上召問巡檢使侯廷賞廷賞曰蠻無他求唯欲鹽耳上曰此常人所欲何不與之乃詔諭丁謂謂即傳告陬落羣蠻感悅因相與盟約不為寇鈔負約者衆殺之且曰天子濟我以食鹽我願輸與兵食自是邊穀有三年之

積七月高州刺史田彥伊子承寶等百二十二人來朝
賜巾服器幣以承寶為山河使九溪十洞撫諭都監六
年四月丁謂等言高州義軍務頭角田承進等擒生蠻
六百六十餘人奪所略漢口四百餘人初益州軍亂議
者恐緣江下峽乃集施黔高溪蠻豪子弟捍禦羣蠻因
熟漢路寇略而歸謂等至即召與盟令還漢口既而有
生蠻違約謂遣承進率衆及發州兵擒獲之焚其室廬
皆震懼伏罪謂乃置尖木砦施州界以控扼之自是寇

鈔始息邊溪峒民得耕種七月南高州義軍指揮使
田彥強防虞指揮使田承海來貢施州叛蠻譚仲通等
三十餘人來歸景德元年高州五姓義軍指揮使田文
鄆來貢富州刺史向通漢遣使潭州營佛事以報朝廷
存卹之惠二年夔州路降蠻首領皆自署職名請因而
命之上不許第令次補牙校是歲辰州諸蠻攻下溪州
為其刺史彭儒猛擊走之擒首以獻詔賜儒猛錦袍
銀帶儒猛自陳母老願被恩典詔特加邑封十二月荆

湖北路言溪峒團練使彭文綰送還先陷漢口五十人
詔授文綰檢校太子賓客知中彭州其年懿州刺史田
漢希卒以其子漢能為刺史三年高州新附蠻首八十
九人來貢五溪都防禦使向通漢表求追贈父母從之
溪州刺史彭文慶率溪峒羣蠻來朝又高州諸名豪百
餘人入貢四年五月以高州刺史田彥伊子承寶為寧
武郎將高州主軍都指揮使田思欽為安化郎將其年
宜州軍亂朝廷恐宜融溪峒因緣侵擾因降詔約勒首

領皆奉詔部分種族無敢輒動大中祥符元年夔州路
言五圍蠻嘯聚謀劫高州欲令暗利砦援之上以蠻夷
自相攻不許發兵三月知元州舒君強知吉州向光普
竝加銀青光祿大夫檢校太子賓客八月黔州言磨嵯
洛浦蠻首領龔行滿等率族二千三百人歸順十月溪
峒諸蠻獻方物于泰山三年澧州言慈利縣蠻相讐劫
知州劉仁霸請率兵定之上恐深入蠻境使其疑懼止
令仁霸宣諭詔旨遂皆感服四年安遠順南永寧濁水

州蠻酋田承曉等三百七十三人來貢五年詔昨許溪峒蠻夷歸先劫漢口及五十人者特署職名仍聽來貢如間緣此要利輒掠邊民充數所在切辨察之其年夔蠻千五百人乞朝貢上慮其勞費不許又詔施州溪蠻朔望犒以酒殼閏十月五溪蠻向貴升及磨嵯洛浦蠻來貢六年夔州蠻彭延暹龔才晃等來貢辰州溪峒都指揮使魏進武率山猺數百人數寇城砦朝廷不欲發兵窮討乃降詔招諭七年進武詣吏請罪署為三班借

職監房州稅仍賜裝錢八年詔中彭州彭文綰歲賜錦袍天禧元年溪州蠻寇擾遣兵討之二年辰州都巡檢使李守元率兵入白霧團擒蠻寇十五人斬首百級降其首二百餘人知辰州錢絳等入下溪州破砦柵斬蠻六十餘人降老幼千餘刺史彭儒猛亡入山林執其子仕漢等赴闕詔高州蠻捕儒猛來獻者厚加賞典其年儒猛因順州蠻田彥晏上狀本路自訴求歸轉運使以聞上哀憐之特許釋罪儒猛乃奉上所略民口器甲詔

辰州通判劉中象召至明灘與歃血要盟遣之詔以仕漢為殿直儒霸儒聰為借職賜冠帶緺帛富州刺史向通漢率所部來朝貢名馬丹砂銀裝劒槊兜鍪彩牌等物詔賜襲衣金帶鞍勒馬并其子光澤以下器幣有差特許通漢五日一朝踰月通漢上五溪地理圖願留京師上嘉美之特授通漢檢校太傅本州防禦使還賜疆土署其子光澤等三班職名通漢再表欲留京師不允乃為光澤等求內地監臨及言歲賜衣願使者至本任

竝從之既辭又賜以襲衣金帶三年通漢卒以其子光
憲知州事其後光澤不為親族所容上表納土上察其
意不許四年知古州向光普遣使鼎州營僧齋以祝聖
壽初北江蠻酋最大者曰彭氏世有溪州州有三曰上
中下溪又有龍賜天賜忠順保靜感化永順州六懿安
遠新給富來寧南順高州十一總二十州皆置刺史而
以下溪州刺史兼都督主十九州皆隸焉謂之誓下州
將承襲都督主率羣酋合議子孫若弟姪親黨之當立

者具州名移辰州為保證申鈐轄司以聞乃賜勅告印符受命者隔江北望拜謝州有押案副使及校吏聽自補置彭氏自允殊文勇儒猛相繼為下溪州刺史至仕漢為殿直留西京後輒遁歸天聖初以狀白辰州自言父老兄亡潛歸本道願放還家屬詔徙其家京師舍以官第未幾儒猛言仕漢逃歸誘羣蠻為亂遣別子仕端等殺之朝廷嘉其忠降詔獎諭時儒猛為檢校尚書右僕射特遷左僕射又以仕端為檢校國子祭酒知洛州

加賜鹽三百斤綵三十匹彭氏有文綰者知中彭州即忠順州也三年儒猛攻殺文綰其子儒索率其黨九十二人來歸補儒索復州都知兵馬使餘官為稟給五年儒猛死仕端以名馬來獻詔還其馬命知下溪州賜以袍帶七年遂以其弟仕羲貢方物明道初仕端死復命仕羲為刺史累遷檢校尚書右僕射自允殊至仕羲五世矣仕羲有子師寶景祐中知忠順州慶歷四年以罪絕其奉貢蓋自咸平以來始聽二十州納貢歲有常賜

蠻人以為利有罪則絕之其後師寶數自訴請知上溪州皇祐二年始從其請朝貢如故既而師寶妻為仕義取去師寶忿恚至和二年與其子知龍賜州師黨舉族趨辰州告其父之惡且言仕義嘗殺誓下十三州將奪其符印并有其地貢奉賜予悉專之自號如意大王補置官屬將起為亂於是知辰州宋守信與通判賈師熊轉運使李肅之合議率兵數千深入討伐以師寶為鄉導兵至而仕義遁入他峒不可得俘其孥及桐柱而官

軍戰死者十六七守信等皆坐貶自是蠻獠數入寇鈔
邊吏不能制朝廷姑欲無事閒遣吏諭旨許以改過自
歸裁損五七州貢奉歲賜初輒不聽後遣三司副使李
參文思副使竇舜卿侍御史朱處約轉運使王綽經制
大出兵臨之且馳檄招諭而仕羲乃陳本無反狀其僭
稱號補官屬特遠人不知中國禮義而然守信等輕信
師寶之譖擅伐無辜願以二十州舊地復貢奉內屬朝
廷又遣殿中丞雷簡夫往視之嘉祐二年仕羲乃歸所

掠兵丁五十人械甲千八百九事率蠻衆七百飲血就降辰州亦還其孥及銅柱時師寶已死遣師黨歸知龍賜州戒勿殺自是仕義歲奉職貢然黠鷺數盜邊即辰州界白馬崖下喏溪聚衆據守朝廷數招諭令歸侵地不聽熙寧三年為其子師綵所弑師綵專為暴虐其兄師晏攻殺之并誅其黨納誓表于朝并上仕義平生鞍馬器服仍歸喏溪地乃命師晏襲州事五年復以馬皮白峒地來獻詔進為下溪州刺史賜母妻封邑章惇

經制南北江湖北提點刑獄李平招納師晏誓下州峒
蠻張景謂彭德儒向永勝覃文猛覃彥霸各以其地歸
版籍師晏遂降詔脩築下溪州城并置砦於茶灘南岸
賜新城名會溪新砦名黔安戍以兵隸辰州出租賦如
漢民遣師晏詣闕授禮賓副使京東州都監官其下六
十有四人元豐八年湖北轉運司言辰州江外生蠻覃
仕穩等願內附詔不許招納其後彭仕誠者復為都誓
主元祐三年羅家蠻寇鈔詔召仕誠及都頭覃文懿等

至辰州約束之是年知誓下保順州彭儒武知永順州
彭儒同知謂州彭思聰知龍賜州彭允宗知藍州彭士
明知吉州彭儒崇各同其州押案副使進奉興龍節及
冬至正旦溪布有差初熙寧中天子方用兵以威四夷
湖北提點刑獄趙鼎言峽州峒首刻剥亡度蠻衆願內
屬辰州布衣張翹亦上書言南北江利害遂以章惇察
訪湖北經制蠻事而南江之舒氏北江之彭氏梅山之
蘇氏誠州之楊氏相繼納土創立城砦使之比內地為

王民北江彭氏已見前南江諸蠻自辰州達于長沙邵
陽各有溪峒曰叙曰峽曰中勝曰元則舒氏居之曰獎
曰錦曰懿曰晃則田氏居之曰富曰鶴曰保順曰天賜
曰古則向氏居之舒氏則德郭德言君疆光銀田氏則
處達漢瓊漢希漢能漢權保金向氏則通漢光普行猛
永豐永晤皆受朝命自治平末光銀入貢故事南江諸
蠻亦隸辰州貢進則給以驛券光銀援以為請詔以券
九道給之其後有峽州舒光秀者以刻剝其衆不附張

翹言南江諸蠻雖有十六州之地惟富峽叙僅有千戶餘不滿百土廣無兵加以荐饑近向永晤與繡鶴叙諸州蠻自相讐殺衆苦之咸思歸化願先招富峽二州俾納土則餘州自歸并及彭師晏之孱弱皆可郡縣詔下知辰州劉策商度策請如翹言熙寧五年乃遣章惇察訪未幾策卒乃以東作坊使石鑑為湖北鉅轄兼知辰州且助惇經制明年富州向晤獻先朝所賜劍及印來歸順繼而光銀光秀等亦降獨田氏有元猛者頗桀驁

難制異時數侵奪舒向二族地惇遣左侍禁李資將輕
兵往招諭資辰州流人曩與張翹同獻策者也福宕無
謀襄慢夷獠遂為懿治州蠻所殺惇進兵破懿州南江
州峒悉平遂置沅州以懿州新城為治所尋又置誠州
元祐初傅堯俞王巖叟言沅誠州創建以來設官屯兵
布列砦縣募役人調戍兵費鉅萬公私騷然荆湖兩路
為之空竭又自廣西融州創開道路達誠州增置潯江
等堡其地無所有湖廣移賦以給一方民不安業願斟

酌廢置朝廷以沅州建置至是十五年蠻情安習已久但廢誠州為渠陽軍而沅州至今為郡元祐初諸蠻復叛朝廷方務休息痛懲邀功生事廣西張整融州溫嵩坐擅殺蠻人皆寘之罪詔諭湖南北及廣西路曰國家疆理四海務在柔遠頃湖廣諸蠻近漢者無所統壹因其請吏量置城邑以撫治之邊臣邀功獻議勑通融州道路侵逼峒穴致生疑懼朝廷知其無用旋即廢罷邊吏失於撫遏遂爾扇搖其叛首楊晟臺等竝免追討諸

路所開道路並置堡砦廢自後五溪郡縣棄而不問
崇寧以來開邊拓土之議復熾於是安化上三州及思
廣洞蒙光明樂安峒程大法都丹團黃光明靖州西道
楊再立辰州覃都管罵等各願納土輸貢賦又令廣西
招納左右江四百五十餘峒宣和中議者以為招致熟
羌接武請吏竭金帛繒絮以啗其欲捐高爵厚奉以侈
其心開辟荒蕪草刦城邑張皇事勢僥倖賞恩入版圖
者存虛名充府庫者亡實利不毛之地既不可耕狼子

野心頑冥莫革建築之後西南夷獠交寇而溪峒子蠻亦復跳梁士卒死於干戈官吏沒於王事肝腦塗地往往有之以此知納土之議非徒無益而又害之所由生也莫若俾帥臣監司條具建築以來財用出入之數商較利病可省者省可併者併減戍兵漕運而夷狄可撫邊鄙可亡患矣乃詔悉廢所置初郡其餘諸蠻自乾興以來或叛或服其類不一各以歲月次之乾興初順州蠻田彥晏率其黨田承恩寇施州暗利砦縱火而去夔

州發兵擊之俘獲甚衆彥晏在真宗朝為歸德將軍檢
校太子賓客知順州承恩者知保順州田彥曉子也明
年彥晏歿邊上誓狀願還所掠金帛器械且輸粟二千
石自贖詔拒其粟舍其所負金帛第令歸掠去戶口仍
加彥晏寧遠將軍檢校工部尚書承恩檢校國子祭酒
兼監察御史皆知州如故後又有田忠顯者與其黨百
九人入貢天聖二年知古州向光普自言嘗劙佛寺請
名報國歲度僧一人許之四年歸順等州蠻田思欽等

以方物來獻時來者三百一人而夔州路轉運使不先以聞詔勅之既而又詔安遠天賜保順南順等州蠻貢京師道里遼遠而離寒暑之苦其聽以貢物留施州所賜就給之願入貢者十人聽三二人至闕下首領聽三年一至七年黔州蠻舒延蠻繡州蠻向光緒皆來貢九年施州屬蠻覃彥綰等寇永寧砦景祐中澧州屬蠻五百餘人入寇時州將崔承祐畏避不以聞為荆湖鈐轄司所奏詔勅罷之寶元二年辰州猶獠三千餘人款附

以州將張昭懿招輯有功進一官慶歷三年桂陽監蠻
猺內寇詔發兵捕擊之蠻猺者居山谷間其山自衡州
常寧縣屬於桂陽郴連賀韶四州環紓千餘里蠻居其
中不事賦役謂之猺人初有吉州巫黃捉鬼與其兄弟
數人皆習蠻法往來常寧出入溪峒誘蠻衆數百人盜
販鹽殺官軍逃匿峒中既招出而殺之又徙山下民他
處至是其黨遂合五千人出桂陽藍山縣華陰峒害巡
檢李延祚潭州都監張克明事聞擢楊畋提點刑獄督

清理事久之不克遂詔湖南轉運使郭輔之等招撫之始於湖南置安撫司蠻所至殺掠居民縱火劫財物被害者甚衆詔被害者并入山捕蠻土兵蠲復有差初發兵捕蠻至或誤殺良民仁宗命訪之口給絹五匹仍拊其家時蠻勢方熾又遣殿中侍御史王絲三司度支副使徐的經制降勅書委知潭州劉沆招諭能自歸者第錄以官沆大發兵臨之以勅書從事降二千餘人使散居所部錄其首領鄧文志黃文晟黃士元皆為三班奉

職又以內殿承制升贊崇班胡元嘗在石硤峒捕殺有
勞進贊莊宅副使元禮賓副使時四年冬也五年二月
餘黨唐和等復內寇乃詔湖南安撫轉運提點刑獄便
宜從事又特賜官兵土丁錢有差於是沅檄楊畋等八
路入討覆蕩桃油平能家源等皆其巢穴捕斬首級甚
衆詔官兵有功者九百餘人第遷一資錄其應募討擊
者道州進士十四人並官之然唐和等猶未平又詔如
聞賊黨欲降其罷出兵追匿者諭使歸復州縣拊存之

是冬蠻復入寇與胡元及右侍禁郭正趙鼎殿侍王孝先戰於華陰峒隘口元等死之劉沆楊畋皆坐黜以劉夔代沆為安撫使夔言唐和等既敗官軍殺將吏聚衆益自疑恐寢為邊患願以詔書招安就補溪峒首領詔可是時湖湘騷動兵不得息六年夏仁宗顧謂輔臣曰官軍久戍南方夏秋之交瘴癘為虐其令太醫定方和藥遣使給之自是繼賜緡錢未幾夔言敗唐和於銀江源轉運使周沆亦言指揮辛景賢招降賊黨五十六戶

二百五十九人錄其首領戒所部拊存之先是命三司
戶部判官崔嶧為體量安撫往議討除招安二策既而
知桂陽監宋守信奏唐和嘯聚千餘衆為盜五六年卒
未能克者朝廷不許窮討故也今衡州監酒黃士元頗
習溪峒事願得敢戰士二千引路土丁二百優給金帛
使之逐捕必得然後已并勑升贊等合力以進彼既勢
窮必將款附詔用其策於是大發兵討之其衆果懼遁
入郴州黃莽山由趙峒轉寇英韶州依山自保是冬帝

閔士卒暴露復諭執政密戒主帥安恤七年唐和遣其子執要領詣官自言願貸糧米居所保峒中時楊畋復為湖南鉅轄詔趨連韶州山下與廣南東西轉運使共告諭之使以兵械上官質其親屬詔補唐和盤知諒房承映承泰文運等五人為峒主授銀青光祿大夫檢校國子祭酒兼監察御史武騎尉知諒等蓋唐和黨也至冬其衆悉降皇祐五年邵州蠻舒光銀因湖南安撫司自陳捍禦之勞願於峒中置中勝州詔可嘉祐二年羅

城峒蠻寇澧州發兵擊走之三年以施州蠻向永勝所
領州為安定州五年以邵州蠻楊光倩知徽州光倩通
漢之子也通漢慶歷初嘗入貢既死光倩襲之舊制溪
峒知州卒承襲者許進奉行州事撫遏蠻人及五年安
撫司為奏給敕告至是光倩行州事七年無他過故命
之

宋史卷四百九十三